

15 participante den Crescendo Piano Competition 2008

ORANJESTAD - Diabierna ultimo, inscripcion a sera pa e Crescendo Piano Competition 2008. Un total di 15 hoben Arubano a inscribi pa participa den e competencia. E participantenan ta: Vanessa Chacon, Victor de la Oliva, Eduardo Garcia, Zavira Heinze, Deborah Helder, Renomar Henriquez, Angelique Janssen, Elisa Partodikromo, Emile Ponson, Willem ten Ham, Jelle Teusink, Jonathan Thiel, Zooey van Nie, Christine Vinck y Kyle Winklaar.

“Un competencia ta un manera pa crea confianza y experiencia cerca hobennan cu talento,” segun Armand Simon, presidente di Stichting Crescendo. “E competencia aki ta duna participantenane oportunidad pa presenta dilanti huradonan profesional y haya e sabor di un competencia internacional y e lifestyle di un concert pianist. Nos ta spera di duna e hobennan cu ta participa inspiracion y sosten den un fase hopi esencial den nan desaroyo musical y artistico.”

E competencia ta consisti di dos round: un preliminary (den categoria 8-12 aña y

13-18 aña) ariba diasabra 27 di September y un final ariba diadomingo 28 di September. Den e preliminary, tur participante ta haya 5 minuut pa presenta un (1) obra. Di cada categoria, 3 participante lo avansa pa e final. Den e finals no tin diferencia entre e dos categorianan mas, y e 6 finalistanan ta haya 10 minuut cada un pa toca dos (2) obra. E obra cu a wordo toca den e preliminary no por wordo ripiti den e final.

E ganador di e Crescendo Piano Competition 2008 ta ricibi un beca di Aruba Scholarship Foundation na balor di Afl. 2500 pa participa como estudiante den e “Festival y Academia del Nuevo Mundo” na Maracaibo.

Eduardo Garcia, ganador di e prome competencia na aña 2006, ta comenta: “Mi participacion a aña aki ta masha importante pa mi, pasobra esaki ta e ultimo aña cu mi por participa. Mi a sali ganador maximo na 2006 y a haya e beca di Aruba Scholarship Foundation. Loque mi a experiencia na Maracaibo, ta algo cu mi no por expresa cu palabra. E tabata algo asina bunita, e



ambiente, e amistad cu otro hobennan, e concierto. Y pa prome biaha den mi bida mi a tende un orchestra toca live. Pa colmo tabata un orchestra di hobennan di mi edad. Mi a pasa hopi great. Por cierto mi ta train hopi duro pa purba gana e premio aki atrobe.”

E organizacion a invita tres miembro di prensa pa forma un panel di hurado. E miembronan di e panel

a ser elegi pa nan sabiduria y experiencia ariba tereno musical. E panel di hurado ta consisti di: Floor Huygen, Juby Naary y Emile Kelkboom. Nan lo dicidi ken ta bay cas cu e “Press Award”.

Durante e final di e Crescendo Piano Competition 2008, e publico den sala di Cas di Cultura tambe lo haya un oportunidad pa vota. Na entrada, nan lo ricibi un formulario pa vota. Despues

di e presentacion di e ultimo finalista e votonan aki lo wordo conta y e finalista cu mas voto ta ricibi un “Audience Award”.

E competencia ta forma parti di e Aruba Piano Festival (www.arubapianofestival.com) y ta tuma lugar ariba 27 y 28 di September na Cas di Cultura. Tickets ta obtenibel na Plaza Bookshop y tur Van Dorp y De Wit stores na Aruba.